

四庫全書

史部

欽定四庫全書

歷代帝王宅京記卷十四

崑山顧炎武撰

建康

吳

吳志孫權傳曰建安十六年自吳徙治秣陵十七年城石頭改秣陵為建業

張紘傳曰紘建計宜出都秣陵權從之

注引江表傳曰絃謂權曰秣陵楚武王所置名為金陵地勢岡阜連石頭聞故老父云昔秦始東巡會稽經此縣望氣者云金陵地形有王者都邑之氣故掘斷連岡改名秣陵今處所具存地有其氣天之所命宜為都邑權善其議未能從也後劉備之東吳宿於秣陵周觀地形亦勸權都之權曰智者意同遂都焉黃都二年自公安都鄂改名武昌

黃龍元年秋九月遷都建業因故府不改館

赤烏八年秋八月遣校尉陳勲將屯田及作士三萬人鑿句容中道自小其至雲陽西城通會市作邸閣十年春二月權適南宮三月改作太初宮諸將及州郡皆義作

江表傳載權詔曰建業宮乃朕從京來所作將軍府寺耳材柱率細皆已腐朽常恐損壞今未復西可徙武昌宮材瓦更繕治之有司奏言曰武昌宮已二十八歲恐不堪用宜下所在通更伐致權曰大禹以卑宮為美今

軍事未已若更通伐妨損農桑徙武昌材瓦自可用也

建康宮殿簿曰太初宮中有神龍殿去縣三里左太冲  
與都賦曰抗神龍之華殿是也赤烏殿在縣東北五里

十一年春三月宮成

孫亮傳曰五鳳二年冬十二月作太廟

孫皓傳曰甘露元年秋九月從西陵督步闡表徙都武

昌

寶鼎元年冬十二月還都建業

二年夏六月起顯明宮冬十二月皓移居之

太康地記  
曰吳有太

初方三百丈權所起也昭明宮方五百丈皓所作也避  
晉諱故曰顯明吳歷云顯明在太初之東江表傳曰  
孫皓營新宮二千石以下皆自入山督攝伐木又破壞  
諸營大開園囿起土山樓觀窮極伎巧工役之費以億  
萬計陸凱固諫不從陸凱傳上疏言武昌土地寔危險而墉堦非

王都安國養民之處船泊則沈漂陵居則峻危且童謠  
云寧飲建業水不食武昌魚寧還建業死不止武昌居  
臣聞翼星為變熒惑作妖童謠之言生於天心乃以安  
居而比死足明天意知民所苦也

宋書禮志曰孫權始都武昌及建業不立郊兆至末年

太元元年十一月祭南郊其地今秣陵縣南十餘里郊中是也

又曰孫權於建業立兄長沙桓王策廟於朱爵橋南子亮代立明年正月於宮東立權廟曰太祖廟孫皓追尊父和曰文皇帝寶鼎二年立廟京邑號曰清廟

晉

晉書元帝本紀曰建武元年春三月立宗廟社稷於建康

冬十一月丁卯立太學

大興元年冬十一月新作聽訟觀

禮志曰大興二年立南郊於巳地

成帝本紀曰咸和四年春正月蘇碩攻臺城焚太極東  
堂城閣皆盡二月以建平園為宮

五年秋九月造新宮始繕苑城

世說曰桓宣武移鎮南州制街衢平直人謂王東亭曰  
丞相初營建康無所因陳而制置紆曲方此為劣東亭



曰此丞相乃所以為巧江左地促不如中國若使阡陌條暢則一覽而盡故紆餘委曲若不可測

七年冬十二月庚戌帝遷於新宮

八年春正月辛亥朔詔曰昔大賊縱暴宮室焚蕩元惡雖剪未暇營築有司屢陳朝會逼狹遂作斯宮子來之勞不日而成既獲臨御大饗羣后九嬪充庭百官象物知君子勤禮小人盡力矣思蠲密網咸同斯會其赦五歲刑以下

禮志曰咸和八年正月於覆舟山南立北郊

又曰咸和中詔內外諸軍戲兵於南郊之場故其地因

名鬪場

宋書禮志曰明帝太寧三年七月始詔立北郊未及建而帝崩故成帝咸和八年正月追述前旨於覆舟山南立之

本紀又曰咸康二年新作朱雀浮桁

二年春正月辛卯立太學

宋書禮志孝武時以太學在水南縣遠有司議依升平元

年於中堂權  
立行太學

禮志曰海西公於鍾山立流杯曲水延百僚

孝武帝本紀曰太元三年春二月乙巳作新宮帝移居  
會稽王邸秋七月辛巳帝入新宮

謝安傳曰是時宮室毀壞安欲繕之尚書令王彪之等  
以外寇為諫安不從竟獨決之宮室用成皆仰模玄象  
合體辰極而役無勞思

王彪之傳孝武帝本紀曰彪之與謝安共掌朝政安欲

更營宮室彪之曰中興初即位東府殊為儉陋元明二  
帝亦不改制蘇峻之亂成帝止蘭臺都坐殆不蔽寒暑  
是以更營修築方之漢魏誠為儉約復不至陋殆合豐  
約之中今日可隨時增益修補而已強寇未殄正是休  
兵養士之時何可大興功力勞擾百姓耶安曰宮室不  
壯後世謂人無能彪之曰任天下事當保國寧家朝政  
惟允豈以修屋宇為能耶安無以奪之故終彪之之世

不改造焉

彪之以太元  
二年十月卒

徐廣晉紀曰孝武寧康二年尚書令王彪之等啟改作  
新宮太元三年二月內外軍六千人始營築至七月而  
成太極殿高八丈長二十七丈廣十丈尚書謝萬監視  
賜爵關內侯大匠毛安之關中侯

此言啟作新宮出  
於彪之似未審

宋明帝文章志曰太元中新宮成議者欲屈王獻之題  
榜以為萬代寶謝安與王語次因及魏時起凌雲閣忘  
題榜乃使韋仲將懸梯上題之欲以風動其意王解其  
旨正色曰此奇事韋仲將魏朝大臣安可使其若此有

以知魏德之不長安知其心乃不復逼之本紀又曰六年春正月帝初奉佛法立精舍於殿內引諸沙門以居之

十六年春正月庚申改築太廟

秋九月新廟成

禮志曰太廟殿正室十四間東西儲各一間合十六間棟高八尺四寸

本紀又曰十七年秋八月新作東宮

二十一年春正月造清暑殿

夏四月新作永安宮

二十一年秋九月帝崩於清暑殿帝為清暑殿有識者以為清暑反為楚聲哀楚之徵也俄而帝崩

王雅傳曰帝起清暑殿於後宮開北上閣出華林園與美人張氏同遊止惟雅與焉

宋書五行志曰晉孝武太元中立內殿名曰清暑少時而崩時人曰清暑者反言楚聲也果有哀楚之聲有人

曰非此之謂也識云代晉者楚及桓玄篡位自號曰楚桓玄傳曰將修殿宇乃移入東宮又開東掖平昌廣莫及宮殿諸門皆為三道

宋書禮志曰晉氏南遷立南郊於巳地

安帝本紀曰義熙十年城東府

宋書武帝本紀亦曰義熙十年築東府起府舍

宋

南史宋文帝本紀曰元嘉十五年秋七月新作東宮

宋書文帝本紀曰元嘉二十年春正月於臺城東西開



萬春千秋二門

又曰元嘉二十年度宮之辰地八里之外整制千畝開阡陌御耕壇於中阡東陌北

又曰元嘉二十年復立國子學二十七年廢故洛京社又曰禮左宗廟右社稷歷代遵之

稷在廟之右而江左又然也吳時宮東門雩門疑吳社社亦在宮東與廟同所也宋仍舊無所改作

二十三年築北堤立玄武門於樂遊園北築景陽山於

華林園

何尚之傳曰上欲於湖中立方丈  
蓬萊瀛洲三神山尚之固諫乃止

二十五年夏四月乙巳新作閭闔廣莫二門改先廣莫門曰承明開陽門曰津陽

孝武帝本紀曰孝建元年春正月起正光殿

大明三年秋九月壬辰於玄武門北立上林苑

禮志曰孝武大明三年九月尚書右丞徐爰議郊祀之

位遠古蔑聞禮祀燔柴於泰壇祭天也兆於南郊就陽位也漢初甘泉河東裡埋易位終亦徙於長安南北光

武紹祚定二郊洛陽南北晉氏過江悉在北及郊兆之  
議紛然不一又南出道狹未議開闢遂於東南已地創  
立丘壇皇宋受命因而弗改且居民之中非邑外之謂  
今聖圖重造舊章畢新南驛開塗陽路修遠謂宜移郊  
正午以定天位博士司馬興之傅郁太常丞陸澄並同  
爰議乃移兆郊於秣陵牛頭山西正在宮之午地世祖  
崩前廢帝即位以郊舊地為吉祥移還本處

又曰北郊晉成帝世始立本在覆舟山南宋太祖以其

地為樂遊苑移於山西北後以其地為北湖移於湖塘  
西北其地卑下泥濕又移於北石村東其地又以為湖  
乃移於鍾山北京道西與南郊相對後罷白石東湖北  
郊還舊處

又曰大明三年冬十一月甲子立皇后蠶宮於西郊隋  
書禮儀志曰宋孝武大明四年始於臺城西白石里為  
先蠶設兆域置大殿七間又立蠶觀

南史宋孝武帝紀曰大明五年夏五月起明堂於國學

南丙巳之地

五年秋閏九月丙申初立馳道自閭闔門至於朱雀門  
又自承明門至於玄武湖

六年夏四月庚申新作大航門

五月丙戌置凌室於覆舟山修葺永之禮

七年冬十二月巳未於博望梁山立雙闕

武帝本紀曰孝武大明中壞上所居陰室於其處起玉  
燭殿與羣臣觀之牀頭有土鄣壁上葛燈籠麻繩拂侍

中袁顛盛稱上儉素之德孝武不答獨曰田舍公得此已為過矣

前廢帝本紀曰大明八年秋七月乙卯罷南北二馳道  
景和元年秋八月庚辰以石頭城為長樂宮東府城為  
未央宮中申以北邙為建章宮南第為長揚宮己丑復  
立南北二馳道

良吏傳曰晉世諸帝多處內房朝宴所臨東西二堂而  
己孝武末年清暑方構高祖受命無所改作所居惟稱

西殿不制嘉名太祖因之亦有合殿之稱及世祖承統  
制度奢廣犬馬餘菽粟土木衣綈繡追陋前規更造正  
光玉燭紫極諸殿雕欒綺節珠窻網戶嬖女幸臣賜傾  
府藏

齊

南齊書高帝本紀曰建元二年夏五月立六門都牆王  
儉傳曰上壞宋明宗紫極殿以材柱起宣陽門儉與褚  
淵及叔父僧虔連名上表諫上手詔酬納宋世外六門

設竹籬是年初有發白虎樽者言白門三重門竹籬穿  
不完上感其言改立都牆儉又諫上答曰吾欲令後世  
無以加也

王儉集有諫壞宋明帝紫極殿以材柱起宣陽門表其  
文曰臣聞德者身之基儉者身之興春臺將立晉卿秉  
議北宮肇構漢臣盡規彼二君者或列國常侯或守文  
中主尚使諫諍在義即悅况陛下聖哲應期臣等職司  
隆重敢藉前誥竊乃有心陛下登庸宰物節省之教既



昭龍衮璇極簡約之訓彌遠乾華外構采椽不斷紫極  
故材為宣陽門臣等未譬也夫移心疾於股肱非良醫  
之美畏影迹而馳騫豈靜處之方且又三農在日千畝  
咸事輟望歲之勤興土木之役非所以宣昭大猷光示  
遐邇若以門居宮南重陽所屬年月稍久漸就淪胥自  
可隨宜修理而合度改作之煩於是乎息所啟謬合請  
付外施行

武帝本紀曰永明元年春正月甲子築青溪舊宮

梁書阮孝緒傳建武末青溪宮東門無故自崩大風拔  
東宮門外楊樹或以問孝緒曰青溪皇家舊宅齊為木  
行東者木位今東門自壞木其衰矣

南史齊和帝紀永明中望氣者云新林婁湖青溪並有天  
子氣於其處大起樓苑宮觀武帝屢游幸以應之又起  
舊宮於青溪以弭其氣而明帝舊居東府城西延興末  
明帝龍飛至是梁武帝衆軍城於新林而武帝舊宅亦  
在征虜

二年秋七月癸未詔曰夫樂所自生先哲垂誥禮不忘  
本積代同風是以漢光遲回於南陽魏文殷勤於譙國  
青溪宮體天含暉則地栖寶光定靈源允集符命在昔  
期運初開經綸方遠繕築之勞我則未暇時流事往永  
惟哽咽朕以寡薄嗣奉鴻基思存締構式表王迹考星  
創制揆曰興功子來告畢規模昭備宜申釁落之禮以  
暢感慰之懷可克日小會八月丙午車駕幸舊宮小會

設金石樂

梁書南平王偉傳齊世青溪宮改為芳林園  
天監初賜偉為第偉又加穿增植嘉樹珍果

果窮極雕麗每與賓客遊其中  
命從事中郎蕭子範為之記  
王儉傳曰永明三年省

總明觀於儉宅開學士館

南齊書王湛傳未領東觀祭酒即明帝所置總明觀也

本紀又曰五年秋九月辛卯車駕幸商廳館館上所立  
在孫陵岡世呼為九日臺者也

冬十一月初起新林苑

十一年秋七月上大漸詔曰內殿鳳華壽昌耀靈三處  
是吾所改制夫貴有天下富兼四海宴處寢息不容乃  
陋謂此為奢儉之中慎勿壞去

鬱林王本紀曰毀世祖招婉殿乞閹人徐龍駒為齋

明帝本紀曰建武元年冬十一月詔省新林苑先是民物悉以還主原責本直

二年冬十月丁卯詔曰軌世去奢事殷哲后訓物以儉理鏡前王朕屬流弊之末襲澆浮之季雖恭己宏化刻意隆平而禮讓未興侈華猶競永覽元風兢言集愧思所以還淳改俗反古移民可罷東田毀興光樓

本紀又曰廢文帝所起太子東田斥賣之蓋文惠太子

所起又曰帝潛信道術巫覡云後湖水頭經過宮內致帝有疾帝乃自至大官行水溝左右啟大官若無此水則不立帝決意塞之欲南引淮流會崩而寢

東昏侯本紀曰後宮遭火之後更起仙華神仙玉壽諸殿刻畫雕彩青葢金口帶麝香漆壁錦幔珠簾窮極綺麗繁役工匠自夜達曉猶不副速乃別取諸寺佛剎殿藻井仙人騎獸以充足之世祖興光樓上施青漆世謂之青樓帝曰武帝不巧何不純用瑠璃

三年夏於閔武堂起芳樂苑山石皆塗以五采跨池水立紫閣諸樓觀壁上畫男女私褻之像種好樹美竹天時盛暑未及經日便就萎枯於是徵求民間望樹便取毀撤牆屋以移致之朝栽暮拔道路相繼花藥雜草亦復皆然

梁

梁書武帝本紀曰天監元年冬十一月己未立小廟四年春二月立建興苑於秣陵建興里

五年秋八月辛酉作太子宮

六年秋八月京師大水因濤入加御道七尺

九月丁亥改閱武堂為德陽堂聽訟堂為儀賢堂

七年春正月戊戌作神龍仁虎闕於端門大司馬門外  
二月乙卯新作國門於越城南

九年春正月庚寅新作綠淮塘北岸起石頭迄東冶南  
岸起後渚籬門迄三橋

十年初作宮城門三層樓及門二道



卷十四  
十一年春三月丁巳築西靜壇於鍾山

十二年春二月新作太極殿改為十三間

南史曰以從  
閏數江淹

銅劍讚序曰今太極殿前  
兩大銅鐘周景王所鑄也

夏六月癸巳新作太廟增基九尺庚子太極殿成

冬十月丁亥詔曰明堂地勢卑濕未稱乃心外可諒就  
埤起以盡誠敬

普通二年夏四月乙卯改作南北郊

丙辰詔曰夫欽若昊天歷象無違躬執耒耜盡力致敬

上協星鳥俯順民時平秩東作義不在南前代因襲有乖禮制可於震方簡求沃野具茲千畝庶允舊章

三年秋八月辛酉作二郊及籍田並畢

魏書蕭衍傳曰衍崇信佛道於建業起同泰寺又於故宅立光宅寺於鍾山立大愛敬寺兼管長干二寺皆窮極奇巧殫竭財力百姓苦之

大同八年冬十二月丙辰於宮城西立士林館延集學者

增廣生員立五館置五經博士天監初則何終之賀瑒  
嚴植之明山賓等覆述制旨并撰吉凶軍賓嘉五禮凡  
一千餘卷高祖稱制斷疑大同中於臺西立士林館領  
軍朱异太府卿賀琛舍人孔子祛等遞相講述皇太子  
宣城王亦於東宮宣猷堂及揚州解開講於是四方羣  
國趨學向風雲集於京師矣兼篤信正法尤長釋典聽  
覽餘閒即於重雲殿及同泰寺講述名僧碩學四部聽  
衆常萬餘人

太清元年秋九月王遊苑成

昭明太子傳曰性愛山水於元圃穿築更立亭館與朝士名素者遊其中嘗泛舟後池番禺侯軌盛稱此中宜奏女樂太子不答詠左思招隱詩曰何必絲與竹山水有清音侯慚而止

敬帝本紀曰太平元年冬十一月乙卯起雲龍神虎門

陳

陳書高祖本紀曰永定二年秋七月起太極殿初侯景

之平也火焚太極殿承聖中議欲營之獨缺一柱至是有樟木大十八圍長四丈五尺流泊陶家後渚監軍柳子度以聞詔中書令沈衆兼起部尚書少府卿蔡儁兼將作大匠起太極殿冬十月甲寅成十二月丙寅帝於太極殿東堂宴羣臣設金石之樂

梁書王僧辨傳僧辨入據臺城其夜軍人探柶失火燒太極殿及東西堂等

世祖本紀曰天嘉五年秋九月城西城

六年秋九月新作大航

隋書五行志曰陳天嘉中盛修宮室起顯德等五殿稱  
為壯麗

陳書宣帝本紀曰太建四年冬十二月丁卯詔曰梁氏  
之季兵火薦臻承華焚蕩頓無遺構寶命維新迄將二  
紀頻事戎旅未遑修繕今工役差間椽楹有擬來歲開  
肇創築東宮可權置起部尚書將作大匠用主監作

五年夏六月治明堂

七年夏六月己酉改作雲龍神虎門

秋九月丁未於樂遊苑龍舟山立甘露亭

九年冬十二月戊申東宮成

廢帝紀曰自梁室亂離東宮焚毀太子居於永福省

十年秋九月乙巳立方明壇於婁湖甲寅輿駕幸婁湖

臨誓

后妃傳論曰後主初即位以始興王叔陵之亂被傷卧於沈香閣時諸姬並不得進惟張貴妃侍焉而柳太后猶居栢梁殿即皇后之正殿也後主沈皇后素無寵不

令得侍疾別居求賢殿至德二年乃於光昭殿前起臨  
春結綺望仙三閣高數丈並數十間其窓牖壁帶懸楣  
欄檻之類並以沉檀香木為之又飾以金玉間以珠翠  
外施珠簾內有寶牀寶帳其服玩之屬瑰奇珍麗近古  
所未有每微風暫至香聞數里朝日初照光映後庭其  
下積石為山引水為池植以奇樹雜以花藥後主自  
居臨春閣張貴妃居結綺閣龔孔二貴嬪居望仙閣並  
複道交相往來

後主末年起齊雲觀國人歌  
之曰齊雲觀冠來無際畔



元帝本紀曰承聖元年冬十一月丙子即皇帝位於江

陵

元帝以下係  
梁事應在前

二年秋八月庚子詔曰夫爰始居毫不廢先王之都受命於周無改舊邦之頌頃戎旃既息闕柝無警去魯興嘆有感宵分過沛隕涕寔勞夕寐仍以瀟湘作亂庸蜀阻兵命將授律指期克定今八表又清四郊無壘宜從青蓋之興言歸白水之鄉江湘委輸方船連舳巴峽舟艦精甲百萬先次建業行寔京師然後六軍遙征九旂

揚旆拜謁瑩陵修復宗社主者詳依舊典以時宣勒  
後周書王褒傳曰元帝以建業凋殘方須修復江陵殷  
盛使欲安之又其故府臣僚皆楚人也並願即都荆郢  
嘗召羣臣議之領軍將軍胡僧祐吏部尚書宗懷太府  
卿黃羅漢御史中丞劉歆等曰建業雖是舊都王氣已盡  
且與北寇鄰接止隔一江若有不虞悔無及矣臣等嘗  
聞荆南之地有天子氣今陛下龍飛建業其應斯乎天  
時人事徵祥如此臣等所見遷徙非宜帝以為然乃顧

謂褒等曰卿意以為何如褒性謹慎知帝多猜忌弗敢  
公言其非唯唯而已後因清閒密諫言辭甚切帝頗納  
之然意好荆楚已從僧祐等策明日乃於衆中謂褒曰  
卿昨日勸還建業不為無理褒以宣室之言豈能顯之  
於衆知其計之弗用也於是不復言及魏兵至江陵帝  
出降

南唐

南唐書烈祖紀曰天祐十一年始城昇州

十四年夏五月城成

昇元元年冬十月丙申以建康為西都

二年冬十月丙子立太學

三年春三月甲午作南郊行宮于間

夏四月作北郊於玄武湖西

四年冬十一月庚辰改西都崇英殿為延英殿凝華內殿前為昇元殿後為雍和殿興祥殿為昭德殿積慶殿為穆清殿

帝性節儉建國始即金陵治所為宮惟加鴟尾設欄檻而已終不改作

周宗傳曰烈祖鎮金陵用宋齊丘議迎吳讓皇都金陵繕府治為宮徙都統府於古臺城都統府成凡二千四百間環一千五百步

歷代帝王宅京記卷十四

欽定四庫全書

歷代帝王宅京記卷十五

崑山顧炎武撰

雲帝

後魏

魏書太祖本紀曰登國六年起河南宮天興元年冬十  
月起天文殿

二年春二月以所獲高車衆起鹿苑於南臺陰北距長

城東包白登屬之西山廣輪數十里鑿渠引武川水注之苑中疏為三溝分流宮城內外又穿鴻雁池

秋七月起天華殿

八月增啓京師十二門作西武庫

冬十月太廟成

十二月天華殿成

三年春三月穿城南渠通於城內作東西魚池

秋七月起中天殿及雲母堂金華堂

四年夏五月起紫微殿玄武樓涼風觀石池鹿苑臺

六年冬十月起西昭陽殿

天賜元年冬十月築西宮

三年夏六月發八部五百里內南丁築灋南宮門闕高  
十餘丈引溝穿池廣苑圃規立外城方二十里分置市  
里經途洞達三十日罷

四年秋七月築北宮垣三十日罷

莫題傳曰道武欲廣宮室規度平城四方數十里將模



鄴洛長安之制運材數百萬

太宗本紀曰永興五年春二月癸丑穿魚池於北苑

神瑞元年春二月乙卯起豐宮於平城東北

二年春二月甲辰立太祖廟於白登之西

泰常元年冬十月起蓬臺於北苑

二年秋七月乙酉起白臺於城南高二十丈

三年冬十月戊辰築宮於西苑

四年春三月癸丑築宮於蓬臺北

秋九月築宮於白登山

五年夏四月起澠南宮

六年春三月發京師六千餘人築苑起自舊苑東包白  
登周回四十餘里

七年秋九月辛亥築平城外郭周回三十二里

八年冬十月癸卯廣西宮起外垣牆周回二十里

世祖本紀曰始光二年春三月庚申營故東宮為萬壽  
宮起永安安樂二殿臨望觀九華堂秋九月永安安樂

二殿成

三年春三月起太學於城東

神麿四年秋七月起承華宮

延和元年秋七月築東宮

三年秋七月辛巳東宮成備置屯衛三分西宮之一太平真君十一年春二月大修宮室皇太子居於北宮

高宗本紀曰興安二年春二月乙丑發京師五千人穿

天淵池

后妃傳曰文成初穿天淵池獲一石銘稱桓帝葬母氏遂迎赴會二十餘萬有司以聞命藏之

太廟

秋七月築馬射臺於南郊

大安四年春三月丙辰起太華殿秋九月辛亥成

顯祖本紀曰皇興五年秋八月丙午傳位於太子帝稱  
太上皇帝已酉徙御崇光宮采椽不斷土階而已

公孫叡傳曰顯祖於苑內立殿勅中秘羣官制名叡曰  
臣聞至尊至貴莫大於帝王天人挹損莫大於謙光伏  
惟陛下躬唐虞之德存道順神逍遙物外宮居之名當

協睿旨臣愚以為宜曰崇光奏可

高祖本紀曰延興三年春正月丁亥改崇光宮為寧光宮

承明元年冬十月丁巳起七寶永安行殿

太和元年春二月辛亥起太和安昌二殿

李冲傳詔曰昔軒皇誕御垂棟宇之構爰歷三代興宮觀之式然茅茨土階昭德於上代層臺廣廈崇威於中葉良由文質異宜華朴殊禮故也是以周成繼業營明

堂於東都漢祖聿興建未央於咸鎬蓋所以尊嚴皇威  
崇重帝德豈好奢惡儉苟敝民力者哉國家皇運統天  
協纂乾厯銳意四方靡遑建制皇宮之度頗為未允太  
祖初基雖粗有經式自茲厥後復多營改至於三元慶  
饗萬國充庭觀光之使具瞻有闕朕以寡德猥承洪緒  
運屬休期事鍾昌會宜遵遠度式茲宮宇指訓規模事  
昭於平日明堂太廟已成於昔年又因徃歲之豐資藉  
民情之安逸將以今春營改正殿違犯時令行之惕然

但朔土多寒事殊南夏自非裁度經春興役徂暑則廣  
制崇基莫由克就成功立事非委賢莫可改制規模非  
任能莫濟尚書冲器用淵博經度明遠可領將作大匠  
司空長樂公亮穆亮可與大匠共監興繕其去故崇新之  
宜修復太極之制朕當別加指授

本紀又曰秋七月己酉二殿成起朱明思賢門

九月庚子起永樂遊觀殿於北苑穿神淵池

三年春正月癸丑坤德六合殿成二月壬寅乾象六合

殿成

夏六月辛未起文石室靈泉殿於方山

四年春正月癸卯乾象四合殿成

南監本亦作六合疑誤

秋七月壬子改作東明觀

九月乙亥思義殿成壬午東明觀成

五年夏四月己亥行幸方山建永固石室於山上立碑

於石室之庭又起鑒元殿

后妃傳曰馮太后與孝文遊於方山顧川阜有終焉之志

因謂羣臣曰若舜葬蒼梧二妃不從豈得遠祔山陵然後為貴哉百歲後神其安此孝文乃詔有司營建壽陵



於方山又起永固石室將終為清廟焉太和  
五年起作八年而成刊石立碑頌太后功德

七年冬十月戊午皇信堂成

九年秋七月丙寅朔新作諸門

十年秋九月辛卯朔詔起明堂辟雍

十二年秋九月辛酉起宣文堂經武殿

閏九月甲子築園丘於南郊

十五年夏四月己卯經始明堂改太廟冬十月明堂太  
廟成十一月丁卯遷七廟神主於新廟十二月壬辰遷

社於內城之西

十六年春二月戊子帝移御永樂宮庚寅壞太華殿冬十一月庚戌成

穆亮傳曰時將建太極殿引見羣臣於太華殿高祖曰朕仰遵先意將營殿宇役夫既至今欲徙居永樂以避囂埃土木雖復無心毀之能不悽愴今故臨對卿等與之取別此殿乃高宗所制爰歷顯祖逮朕冲年即位於此但事來奪情將有改制仰惟疇昔惟深悲感亮稽首

對曰臣聞稽之卜筮載自典經占以決疑古今攸尚興  
建之功事在不易願陛下詢之著龜以定可否又去歲  
役作為功甚多太廟明堂一年便成若仍歲頻興恐民  
力凋敝况材幹新伐為功不固願待逾年小康百姓高  
宗曰若終不為可如卿言後必為之逾年何益朕遠覽  
前王無不興造故有周創業經建靈臺洪漢受終未央  
是作草創之初猶尚若此况朕承累聖之運屬太平之  
基且今八表清晏年穀又登爰及此時以就大功人生

定分脩短命也著蔡雖智其知命乎當委之大分豈假卜筮遂移御永樂宮

本紀又曰十一月乙卯依古六寢權置三室以安昌殿為內寢皇信宮為中寢四合殿為外寢

蔣少游傳於平城將營太廟太極殿遣少游乘傳詣洛量準魏晉基趾

十七年春三月戊辰改作後宮帝幸永興園徙御宣光

殿

南齊書魏虜傳曰什翼珪

道武帝

始都平城猶逐水草無

城郭木末

明元帝

始土著居處佛狸

太武帝

破梁州黃龍徙

其居民大築城邑截平城西為宮城四角起樓女牆門

不施屋城又無塹南門外立二土門內立廟開四門各

隨方色凡五廟一世一間瓦屋其西立太社佛狸所居

雲母等三殿又立重屋居其上飲食厨名阿真厨在西

皇后可孫恒出此厨求食殿西鎧仗庫屋四十餘間殿

北絲綿布絹庫土屋一十餘間太子宫在城東亦開四

門瓦屋四角起樓妃妾住皆土屋婢使千餘人織綾錦  
販賣酤酒養猪羊牧牛馬種菜逐利太官八十餘窖窖  
四千斛半穀半米又有懸食瓦屋數十間置尚方作鐵  
及木其袍衣使宮內婢為之太子別有倉庫其城郭繞  
宮城南悉築為坊坊開巷巷大者容四五百家小者六  
七十家每南坊搜檢以備奸巧城西南山去白登山七  
里於山邊別立父祖廟城西有祀天壇立四十九木人  
長丈許白幘練裙馬尾被立壇上常以四月四日殺牛

馬祭祀盛陳鹵簿邊壇奔馳奏伎為樂城西三里刻石  
寫五經及其國記於鄴取石虎丈石屋基六十枚皆長  
丈餘以充用自佛狸至萬民獻文帝世增雕飾正殿西築

土臺謂之白樓萬民禪位後常游觀其上臺南又有伺  
星樓正殿西又有伺屋琉璃為瓦宮門稍覆以屋猶不  
知為重樓並設削泥采畫金剛力士胡俗尚水又規畫  
黑龍相盤繞以為厭勝

水經注曰羊水又東注於如渾水亂流逕方嶺上有文

明太皇太后陵陵東北有高祖陵二陵之南有永固堂  
堂之四周隅雉列榭階欄檻及扉石梁壁椽屋悉文石  
也檐前四柱采洛陽之八風谷黑石為之雕鏤隱起以

金銀間雲雉有若錦焉堂之內外四側結兩石扶

疑作跌

帳

疑作張

青石屏風以文石為緣並隱起忠孝之容題刻

貞順之名廟前鐫石為碑獸碑至佳左右列柏四周迷  
禽闔日院外西側有思遠靈圖圖之西有齋堂南門表  
二石闕闕下斬山累結御路下望靈泉宮池皎若圓鏡



矣

如渾水又南分為二水一水西出南屈入北苑中歷諸池沼又南逕虎圈東魏太平真君五年成之以牢虎也季秋之月聖上親臨圈上勅虎士効力於其下事同奔戎生致猛獸

朱謀瑋曰穆天子傳云有虎在乎葭中即七萃之士高奔戎請生捕虎必全之

詩所謂禮謁暴虎獻于公所也故魏有捍虎圖也

又逕平城西郭內魏太常七年所成也成周

下有西郭闕文

外有郊天壇壇之東側有郊天碑建興四年立

其水南又屈逕平城縣故城南史記曰高帝先至平城  
史記音義曰在雁門即此縣矣王莽之平順也魏天興  
二年遷都於此太和十六年破太華安昌等殿造太極  
殿東西堂及朝堂夾建象魏朝元中陽端門東西二殿  
門雲龍神虎中華諸門皆飾以觀閣東堂東接太和殿  
殿之東階下有一碑太和中立是洛陽八風谷之石緇  
石也殿之東北接紫宮寺南對承賢門門南即皇信堂  
堂之四周圖古聖忠臣烈士之容刊題其側是辦章郎

彭城張僧達樂安蔣少遊于

下有闕文

堂南對北臺臺甚高

廣臺基四周列壁閣路自內而外國之圖錄秘籍悉積  
基下臺西即朱明閣直侍之官出入所由其水夾御路  
南流逕蓬臺西魏神瑞三年又廢建白樓甚高竦加觀  
榭其上表裏飾以石粉塙曜建素赭白綺分故世謂之  
白樓也後置大鼓於其上晨昏伐以千椎為城里諸門  
啟閉之候謂之戒晨鼓也

又南逕皇舅寺西是太師昌黎馮晉國所造

朱謀瑋曰  
魏書馮熙

字晉國大明太后兄也官定州刺史進爵昌黎王在諸鎮建佛圖精舍合七十二處孝文即位為侍中太師

有五層浮圖其神圖像皆合青石為之加以金銀火齊衆綵之上焯焯有金光又南逕永寧七塔浮圖其制甚妙工在寡雙又南遠出郊郭弱柳蔭街絲楊披浦公私引裂用周圍挽宋書作長塘曲塘所在布護故不可得而論也

一水南逕白登山西服虔曰白登臺名也去平城七里如淳曰平城旁之高城若丘陵矣今平城東十七里有

臺即白登臺也臺南對岡阜即白登山也故漢書稱上  
遂至平城上白登者也為匈奴所圍處孫暢之述畫曰  
漢高祖被圍七日陳平使能畫作美人送與冒頓閼氏  
恐冒頓勝漢其寵必衰說冒頓解圍而去矣

其水又逕寧光宮東獻文帝之為太上皇也所居故宮  
矣宮之東次下有石柱是石虎鄴城東門石橋柱也案  
柱石趙建武中造以其石作工妙徙之於此余為尚書  
伺部與宜都王穆羆同拜北郊親所經見柱側悉鏤雲

炬朱謀瑋曰當作雲烟上有蟠螭甚有形勢信為工巧去子丹碑

側遠矣

其水又南逕平城縣故城東司州代尹治皇都洛陽以

為恒州水左有大道壇廟始光二年少室道士寇謙之

所建也兼諸嶽廟碑亦多所署立其廟階五成宋本作三成

四周欄檻上階之上以木為員基令于相枝梧以板切

宋本作砌其上欄陛承阿上員制如明堂而專室四戶室內

有神坐坐右列玉磬皇輿親降受籙靈壇號曰天師宣

揚道式暫重當時壇之東北舊有靜輪宮魏神麌四年  
造抑亦栢梁之流也臺高廣超出雲間欲令上延霄客  
下絕囂浮太平真君十一年又毀之物不停固白登亦  
繼褫矣水右有三層浮圖直容鷲架悉結石也裝制麗  
質亦盡美善也東郭外太和中闕人岩昌公鉗耳處時  
立祇洹舍於東澤椽瓦梁棟臺壁櫺陛尊容聖像及牀  
坐軒帳悉青石也圖制可觀所恨惟列壁合石疎而不  
密庭中有祇洹碑碑題大篆非佳耳然京邑帝里佛法

豐盛神圖妙塔桀錯相望法輪東轉並為上矣

其水自北苑南出歷京城內河於兩湄太和十年累石  
結岸夾塘之上雜樹交蔭郭南結兩石橋橫為梁又南  
逕籍田及藥圃西明堂東明堂上員下方四周十三戶  
九堂而不為重隅也室外柱內綺井之下施機輪飾縹  
仰象天壯畫北通之宿鳥蓋天也

朱謀瑋曰當作畫北  
辰列宿象蓋天也

每月隨斗所建之辰轉應天道此之異古也加靈臺於  
其上下則引水為辟雍水則結石為塘古準古制是太



和中之所經建也

地理志曰西京大同府陶唐冀州之域虞分并州夏復屬冀州周職方曰北曰并州戰國趙武靈王始置雲中郡秦當作漢屬代王國為平城縣魏為新興郡晉仍屬雁門劉琨表封猗廬為代王都平城

遼史興宗紀曰重熙十三年十一月丁卯改靈州為西京元魏道武於此遂建都邑孝文帝改為司州牧置代尹遷都洛邑改萬年又置恒州高齊文宣帝廢州為恒

安鎮今謂之東城尋復恒州周復為恒安鎮改朔州隋  
仍為鎮唐武德四年置北恒州七年廢貞觀十四年移  
雲中定襄縣於此永淳元年默啜為邊患移民朔州開  
元十八年置雲中州天寶元年改雲中郡乾元元年曰  
雲州乾符三年大同軍節度使李國昌子克用為雲中  
守捉使殺防禦使據州以間僖宗赦克用以國昌為大  
同軍防禦使不受命廣明元年李琢攻國昌國昌兵敗  
與克用奔北地黃巢入京師詔發代北軍尋赦國昌使

討賊克用率三萬五千騎而南收京師功第一國昌封隴西郡王克用子存勗滅梁是以唐莊宗同光三年復以雲中為大同軍節度使晉高祖代唐以契丹有援立功割山前代北地為賂大同來屬因建西京

下云重熙十三年升

為西京而此即云建西京史文之誤

敵樓棚櫓具廣袤二十里門東曰迎

宜南曰朝陽西曰定西北曰拱極元魏宮垣占城之北面雙闕尚在遼既建都用為重地非親王不得主之清寧八年建華嚴寺奉安諸帝石像銅像又有天王寺留

守衙南曰西省北門之東曰大同府北門之西曰大同  
驛初為大同軍節度重熙十三年升為西京府曰大同  
金史地理志曰大同府遼為西京金因之大定五年建  
宮室名其殿曰保安其門南曰奉天東曰宣仁西曰阜  
成天會三年建太祖原廟

置留守司

歷代帝王宅京記卷十五

欽定四庫全書

歷代帝王宅京記卷十六

崑山顧炎武撰

晉陽

北齊

北齊書神武帝本紀曰魏武定三年春正月於并州置  
晉陽宮

後主本紀曰天統三年冬十一月晉陽大明殿成

帝於晉陽起十二院壯麗逾於鄴下鑿晉陽西山為大佛像一夜燈燭萬盆光照宮內

馮子琮傳曰世祖在晉陽既居舊殿少帝未有別所詔子琮監造大明宮宮成世祖親自巡幸怪其不甚宏麗子琮對曰至尊幼年纂承大業欲令敦行節儉以示萬邦兼此北連天闕不宜過復崇峻世祖稱善

後周

周書武帝本紀曰建德六年夏五月戊戌詔曰京城宮

殿已從撤毀并鄴二所華侈過度誠復作之非吾豈容  
因而弗革諸堂殿壯麗並宜除蕩薨宇諸物分賜窮民  
三農之隙別漸營構止蔽風雨務在卑狹

冬十二月戊辰廢并并州宮及六府

隋

隋書煬帝本紀曰大業三年秋八月壬寅詔營晉陽宮  
地理志曰太原縣有晉陽宮

唐



唐書玄宗本紀曰開元五年冬十一月詔曰經邦創制  
建國設險必因時順天統物立極我國家以神武聖德  
應天受命龍躍晉水鳳翔太原建萬代之模為億兆之  
主猶成湯之居亳有周之興岐朕以眇身纂承昌運守  
祖宗之大寶恢中興之宏業叶時卜狩始經此都事本  
因心情兼惟舊昔堯理唐郊武建丹陵之地漢居洛邑  
更表南陽之都今王業所興宮觀猶在列於偏郡情所  
未安非所以恢大聖之宏規展孝思之誠敬其并州宜

置北都改州為太原府刺史為尹司馬為少尹太原晉陽為赤縣諸縣為畿縣秩視京洛兩府

馬燧傳曰燧引軍還太原燧以晉陽王業所起度都城東面平易受敵乃引晉水駕汾而注城之東瀦以為池計寇至省守陴者萬人又決汾水環城多為池沼樹柳以固隄

文宣帝紀曰天保二年冬十月戊申起宣光建始嘉福仁壽諸殿

唐書地理志曰北都天授元年會要長壽元年七月七日置改并州為太原府神龍元年罷二月四日開元十一年復置正月二十日天寶元年曰北京正月二十日上元二年罷九月二十一日肅宗元年

去年號改九年其年四月改元

寶應復為東都

晉陽宮在都之西北宮城周二千五百二十步崇四丈八尺都城左汾右晉潛丘在中長四千三百二十一步廣三千一百二十二步周萬五千一百五十三步其崇

四丈汾東曰東城貞觀十一年長史李勣築兩城之間  
有中城武后時築以合東城宮南有大明宮故宮城也  
宮城東有起義堂倉城中有受瑞壇唐初高祖使子元  
吉留守獲瑞石曰李淵萬吉築壇祠以少牢

太原府太原郡本并州開元十一年為府

晉陽縣有號令堂高祖誓義師於此西北十五里有講  
武臺飛閣顯慶五年築

舊唐書崔神慶傳曰則天時擢拜并州長史先是并

州有東西二城隔汾水神慶始築城相接每歲省防禦  
兵數千人邊州甚以為便

五代史職方考曰并州後唐建北都其軍仍曰河東

冊府元龜曰後唐莊宗同光元年夏四月以太原為西  
京

冬十一月改太原為北都

晉高祖天福元年冬十一月以北京潛龍宅為興義里

大名

五代職方考曰魏州唐曰大名置天雄軍五代皆因之  
後唐建鄴都晉漢因之至周罷大名府後唐曰興唐晉  
曰廣晉漢周復曰大名

唐

冊府元龜曰後唐莊宗同光元年即位於魏州是月升  
魏州為東京改元城縣曰興唐貴鄉縣曰廣晉都督府  
曰興唐府

三年春三月詔故東京為鄴都興唐府與北京太原府

并為次府

晉

晉高祖天福元年冬十二月改興唐府為廣晉府

六年秋八月壬子改鄴都皇城南門應天門為朝名門

大名館為都亭驛

七年夏四月乙丑勅改鄴都羅城及大門諸門羅城南  
垣門為廣運門觀音門為金明門橙槽門為清景門冠  
氏門為永芳門朝城門為景風門大城南門為昭明門

觀德門為廣義門北河門為靖安門魏縣門為膺福門  
尉氏門為迎春門朝城門為興仁門上斗門為延清門  
下斗門為通遠門

出帝開運二年夏四月己丑復以鄴都為天雄軍

漢

漢高祖乾祐元年春三月改廣晉府為大名府

周

後周高祖顯德元年春正月戊寅罷鄴都但為天雄軍




宋史地理志曰慶厯二年建大名府為北京宮城周三里一百九十八步即真宗駐蹕行宮城南三門中曰順豫東曰省風西曰展義東一門曰東安西一門曰西安順豫門內東西各一門曰左右保成次北班瑞殿殿前東西門二東曰凝祥西曰麗澤殿東西時巡殿門次北時巡殿次靖方殿次慶寧殿時巡殿前東西門二東曰曰景清西曰景和京城周四十八里門一十七

熙寧九年改正南南河門曰景風南博曰亨嘉鼓角曰

阜昌正北北河門曰安平北塼曰輝德正東冠氏門曰  
華景冠氏第二重曰春祺子城東曰泰通正西魏縣門  
曰寶成魏縣第二重曰利和子城西曰宣澤東南朝城  
門曰安流朝城第二重曰巽齊西南觀音門曰安正觀  
音第二重曰靜方上水關曰善利下水關曰永濟內城  
創制置北門曰靖武元豐七年廢善利永濟二關

王應麟玉海慶曆二年五月戊午升大名府為北京詔  
曰席萬戶之億兆冠千里之上腴隱然北門壯哉中夏

輿地廣記魏卜偃曰魏大名也其地於今為河中之水  
樂非元城之魏也漢以大名名此失矣今按舊唐書田  
悅稱魏王以魏州為  
大名府其失始此



歷代帝王宅京記卷十六

# 欽定四庫全書

史部

歷代帝王宅京記卷

十七至  
二十

詳校官監察御史<sub>臣</sub>周元良

刑部郎中<sub>臣</sub>許兆椿覆勘

總校官編修臣倉聖脈

校對官中書臣王家賓

謄錄監生臣武先振

欽定四庫全書

歷代帝王宅京記卷十七

崑山顧炎武撰

大梁

五代史職方考曰汴州唐故曰宣武軍梁以汴州為開  
封府建為東都後唐滅梁復為宣武軍晉天福三年升  
為東京漢周因之

後梁

冊府元龜曰太祖開平元年夏四月戊辰升汴州為開封府建東都是月制宮殿及都門名正殿為崇元殿東殿為元德殿內殿為金祥殿萬歲堂為萬歲殿門如殿名大內正門為元化門皇牆南門為建國門滴漏門為啟運門下馬門為升龍門元德殿前門為崇明門正殿東門為金烏門西門為玉兔門正衙東門為崇禮門東偏門為銀臺門宴堂門為德陽門天王門為賓天門皇牆東門為寬仁門浚儀門為厚載門皇牆西門為神獸

門望京門為金鳳門宋門為觀化門尉氏門為高明門  
鄭門為開明門梁門為乾象門酸棗門為興和門封丘  
門為含曜門曹門為建陽門升開封浚儀為赤縣尉氏  
封丘雍丘陳留為畿縣五月改文思院為乾文院同和  
院為佐鸞院

二年秋七月甲午以高明門外繁臺為講武臺是臺西  
漢梁孝王嘗按歌閱樂於此當時因名曰吹臺其後有  
繁氏居於其側里人乃以姓呼之時代綿遠雖官吏亦

從俗馬帝登眺蒐乘訓戎宰臣以是奏而名之

三年春二月以華州酸棗縣長垣縣鄭州中牟縣陽武縣宋州襄邑縣曹州戴邑縣許州扶溝鄆陵縣陳州太康等九縣割屬開封府仍升為畿縣

秋七月改章善門為左右銀臺門其左右銀臺門却改為左右興善門

冬十一月改乾文院為文思院行從殿為興宅殿弓箭庫殿為宣武殿毬場為安毬場



後唐

冊府元龜曰後唐莊宗同光元年冬十二月壬申勅汴州偽庭所立殿宇諸門並去牌額復本名其宣武軍額置於咸安門所在宮院即充行宮應有不合安鴟吻處並可去之

後晉

晉高祖天福二年夏五月丙辰以汴州行宮為太寧宮三年冬十月丙辰詔汴州升為東京置開封浚儀兩縣

為赤縣餘升為畿縣

三年冬十月庚辰詔曰為國之規在於敏政建都之法務要利民厯考前經朗然通論顧惟涼德獲啟丕基當數朝戰伐之餘是兆庶傷殘之後車徒既廣帑廩成虛經年之輓粟飛芻繼日而勞民動衆常煩漕運不給供須今汴州水陸要衝山河形勢乃萬庾千箱之地是四通八達之郊爰自按巡益觀宜便俾升都邑以利兵民汴州宜升為東京開封府時所管屬縣並可仍舊割屬

收管亦升為畿縣其雒京改為西京雍京改為晉昌軍  
丁亥詔改太寧宮門為明德門又改京城諸門名南門  
尉氏門以薰風為名西二門鄭門梁門以金義朝明為  
名北二門酸棗封丘以元化宣陽為名東二門曹門宋  
門以迎春仁和為名

四年春二月改東京玉華殿為永福殿

三月己卯改明德殿為滋德殿以宮城南門同名故也  
五年秋九月戊子改東京上源驛為都亭驛

後漢

高祖天福十二年六月戊辰詔曰浚都重地汴水名區  
控襟帶於八方便梯航於萬國眷言王氣允稱皇居其  
汴州宜仍舊為東京

後周

周太祖廣順元年夏六月以唐都長安時京城等門比  
定今東京諸門薰風等為京城門明德門為皇城門啟  
運等為宮城門升龍等為宣門崇元等為殿門

二年春正月詔開封府修補京師羅郭率府界丁夫五萬五千版築旬日罷

冬十月置弘文館史館集賢館於厚載門內向東橫街東北

通鑑曰廣順三年帝欲祀南郊以自古以來郊祀常在洛陽疑之執政曰天子所都則可以祀百神何必洛陽於是始築圜丘社稷壇作太廟於大梁

世宗顯德二年夏四月乙卯詔曰惟王建國實曰京師

度地居民固有前作東京華夷臻湊水陸會通時向隆  
平日增繁盛而都城因舊制度未恢諸衛軍營或多窄  
陋百司公署無處興修加以坊市之中邸店有限工商  
外至億兆無窮僦貸之資增添不定貧闕之戶供辦實  
難而又屋宇交連街衢湫隘入夏有暑濕之苦居常多  
烟火之憂將便公私須廣都邑宜令所司於京城四面  
別築羅城先立標幟候冬末春初農務閒時即量近甸  
人夫漸次修築春作纜動便令放散如或土工未畢則

迺遷次年修築所冀寬容辦集今後凡有營葬及興置宅竈并草市並須去標幟七里外其標幟內候官中擘畫定街巷軍營倉場諸司公廡院務了即任百姓營造三年春正月戊戌發開封府曹滑鄭州之民十餘萬築大梁外城

三年夏六月癸亥詔曰輦轂之下謂之浩穰萬國駿奔四方繁會此地比為藩翰近見京都人物誼闕閭巷隘隤雨雪則有泥濘之患風旱則多火燭之憂每逢炎蒸

易生疫疾近者開廣都邑展列街坊雖然暫勞久成大  
利朕昨自淮上回及京師周覽康衢更思道濟千門萬  
戶庶諧安樂之心盛暑隆冬倍減寒溫之苦其京城內  
街道濶五十步者許兩邊人戶各於五步內取便種樹  
掘井修蓋涼棚其三十以下至三十五步者各與三步  
其次有差

五年夏五月賜東京新城諸門名在寅曰寅賓門在辰  
曰延春門在巳曰朱明門在午曰景風門在未曰畏景



門在申曰迎秋門在戌曰肅政門在亥曰元德門在子  
曰長景門在丑曰愛景門改大內曰東偏舊賓天門為  
通苑門又以京城東新修驛為懷信驛以待江南貢使  
焉

四年夏四月修永福殿

恭帝顯德六年冬十二月改萬歲殿為紫宸殿

以下考  
宋史本

紀抄  
入

宋京城 按宋史地理志舊城周回二十里一百五十

五步東二門北曰望春

初名和政

南曰麗景南面三門中曰

朱雀東曰保康

大中祥符五年創建

西曰崇明西二門南曰宜秋

北曰閭闔北三門中曰景龍東曰安遠西曰天波

以上宋初

仍梁晉舊名至太平興國四年改今名

新城周回五十里一百六十五步

大中祥符九年增築元豐元年重修政和六年詔有司度國之南展築京城移置官司軍營舊城周四十八里

二百二十三步周顯德三年築王應麟地理通釋曰東京開封府舊城唐建中初李勉築本朝曰闕城亦曰

裏城新城周顯德三年韓通築本朝曰國城亦曰外城以上土醜取鄭州虎牢閭土築之俗呼為卧牛城也

南三門中曰南薰東曰宣化西曰安上東二門南曰朝

陽北曰含輝太平興國四年改寅賓後復西二門南曰順天北曰金

輝北四門中曰通天天聖初改寧德後復東曰長景次東曰永泰

西曰安肅初號衛州門以上皆因周舊名至太平興國四年改今名汴河上水門南

曰大通太平興國四年賜名天聖初改順濟後復今名北曰宣澤舊南北水門皆曰大通熙

寧十年改汴河下南曰上善北曰通津天聖初改廣濟熙寧十年復惠民

河上曰普濟下曰廣利廣濟河上曰咸豐下曰善利舊名

咸通上南門曰永順熙寧十年賜名其後又於金輝門南置開遠

門舊名通遠以上皆太平興國四年賜名天聖初改今名其濠曰護龍河濶十餘

丈濠之內外皆植楊柳粉牆朱戶禁人往來城門皆甕  
城三層屈曲開門惟南薰新鄭新宋封丘正門皆直門  
兩重以通御路金元以下多煙塞舊有十三門南曰南  
薰陳州戴樓東曰新宋揚州新曹西曰新鄭萬勝固子  
北曰陳橋封丘新酸棗衛州今道路所通者惟曹鄭陳  
州揚州南薰固子封丘七門耳

宋朝會要自朱梁建都以汴州為東京皆因藩鎮舊  
制但改名額而周顯德初始廣新城周回四十八里

三百二十三步

趙德麟侯鯖錄 舊城周回二十里一百五十五步

即汴州城唐建中二年節度使李勉重築國初號曰

闕城亦曰裏城新城乃周世宗顯德二年四月詔別

築新城周回四十八里二百二十三步號曰外城又

曰羅城亦曰新城元豐中裕陵命內使宋用臣重築

之

宋敏求東京記 周世宗顯德二年四月詔京城四

面別築羅城三年正月發京畿滑鄭曹之民命薛可言等督之仍命韓通總其事王朴經度凡通衢委巷廣袤之間皆朴定其制踰年而成神宗熙寧中始四面為敵樓作甕城及濬治濠塹

周密癸辛雜志 汴之外城周世宗時所築宋神宗又展拓之其高際天堅壯雄偉南關外有太祖講武池周美成汴都賦形容盡矣梁王鼓吹臺徽宗龍德宮舊址尚在

岳珂程史 開寶戊辰藝祖初修汴京大其城址曲而宛如蚓蝘焉耆老相傳趙中令鳩工奏圖初取方直四面皆有門坊市經緯其間井井繩列上覽而怒自取筆塗之命以幅紙作大圈紆曲縱斜旁注云依此修築故城即當時遺跡也時人咸罔測多病其不宜於觀美熙寧乙卯神宗在位遂欲改作覽苑中牧豚及內作坊之事卒不敢更第增埤而已及政和間蔡京擅國亟奏廣其規以便宮室苑圃之奉命官侍

董其役凡周旋數十里一撤而方之如矩墉堞樓櫓  
雖甚藻飾而蕩然無復曩時之堅樸矣一時迄功第  
賞侈其事至以表記詞科之題槩可想見其張皇也  
靖康金師南下尼堪幹里雅布揚鞭城下有得色曰是  
易攻下令植砲四隅隨方而擊之城既引直一砲所  
望一壁皆不可立竟以此失守藝祖沈機遠睹至是  
始驗宸筆所定圖宋承平時藏祕閣今不復存  
和維愚見紀忘 汴之外城門名各有意義如云鄭



門以其通往鄭州也如云酸棗門以其通往延津即  
舊酸棗縣也其固子門未知其義近閱宣和遺事內  
應載上清寶籙宮成浚濠水深二丈東則景龍門橋  
西則天波門橋二橋之下壘石為固引舟相通而橋  
上人物往往不覺又郡城沿革云西面門從南曰順  
天門俗名龍門次曰利澤水門汴河自此入城次北  
曰開遠門又名萬勝門次北曰金輝門俗名固子門  
歐陽公歸田錄亦云飲於固子橋然則以壘石為固

而名其橋因以名其門也周禮掌固之職掌修城郭  
橋之固以為固以依阻故曰固或曰固作顧視也汴  
城卧牛之形北視黃河為子而子不敢來害其母此  
臆度之說無所據

今省城即宋之舊裏城周回二十里一百九十步  
高三丈五尺崇明洪武初重築外包以磚門五東  
曰麗景南曰南薰西曰大梁北曰安遠東北曰仁  
和外建月城上各建樓其西舊名望京角樓四敵

臺八十四窩舖八十三東西南門甕城內皆有漢

壽亭侯廟而北門甕城內則元帝廟也皆近時建

宋大內宮室 宋史地理志曰東京汴之開封也梁為

東都後唐罷晉復為東京宋因周之舊為都建隆三年

廣皇城東北隅命有司畫洛陽之制按圖修之而皇居

始壯麗矣雍熙三年詔殿前指揮使劉延翰等經度之

以居民多不欲徙遂罷宮城周回五里南三門中曰乾

元 宋初依梁晉之舊名曰明德太平興國三年改丹鳳  
大中祥符八年改正陽明道二年改宣德雍熙元年

改今名 全唐詩話今東京皇城乾元門舊宣武軍鼓角樓也節度使王彥威有詩刻石在其上後梁氏建國

其石不在 東曰左掖西曰右掖東西面門曰東華西華舊名

寬仁神獸開寶三年改今名熙北一門曰拱宸舊名元寧十年又改東華門北曰諛門武大中

祥符五年改今名熙寧十年改門內西橫門曰臨華乾元門內正南門曰大慶東

西橫門曰左右升龍左右北門內各二門曰左右長慶

熙寧間改左右長慶 左右銀臺東華門內一門曰左承天祥符

乾德六年賜名大中祥符六年正月天書降其上詔加祥符二字而增葺之 西華門內一門

曰右承天左承天門內道北門曰宣祐舊名光天大中祥符八年改大

寧明道元年改今名 正南門內正殿曰大慶東西門曰左右太和

宋初曰日華月華大 正衙殿曰文德 宋初曰文明 雍熙元年改今名 熙寧

間改南門 兩掖門曰東西上閣東西門曰左右嘉福 宋初

曰左右勤政明道 大慶殿 舊名崇元 乾德四年重修 改元年十月改今名 曰乾元 太平興國九年改朝

元大中祥符八年改天 北有紫宸殿 舊名崇德 明安明道三年改今名 道元年改 視朝

之前殿也 西有垂拱殿 舊名長春 明常日視朝之所也

次西有皇儀殿 開寶四年賜名 滋福 又次西有集英殿

舊名廣政 開寶三年改大明 淳化間曰含光大 宴殿也 中祥符八年名會慶 明道元年十月改今名

殿後有需雲殿

舊名玉華後改瓊華熙寧初改名

東有昇平樓

舊名紫雲明道

元年

改 宮中觀宴之所也宮後有崇政殿

舊名簡賢講武太平興國二年

改今名熙寧間改北橫門曰通極

閱事之所也殿後有景福殿西有殿

北向曰延和便坐殿也

大中祥符七年建後苑東門泊北向便殿成賜名宣和門永明

殿明道元年改端明二年改今名

凡殿有門者皆隨殿名宮中又有延

慶

舊名萬歲大中祥符七年改

安福觀文

舊名集聖明道二年改肅儀慶歷八年改今名

清

景慶雲玉京等殿

清景明道元年改

壽寧堂延春閣

舊名萬春寶元元年

改

福寧殿

即延慶明道元年改

東西有門左右昭慶觀文殿西門

曰延真其東真君殿曰積慶前建感真閣又有龍圖閣

下有資政崇和宣德述古四殿天章閣下有羣玉藍珠

二殿後有寶文閣

即壽昌閣慶歷元年改

閣東西有嘉德延康二

殿前有景輝門後苑東門曰寧陽

即宣和門明道元年改

苑內有

崇聖殿太清樓其西又有宣聖化成

即玉宸殿明道元年改

金華

西涼清心等殿翔鸞儀鳳二閣華景翠芳瑤津三亭延

福宮有穆清殿延慶殿北有柔儀殿

初有殿無名章獻太后名曰崇徽明

道元年改寶慈景祐二年改今名

崇徽殿北有欽明殿

舊名天和明道元年改觀文又改清

風治平三年改今名延福宮北有廣聖宮天聖三年建名長內有

太清玉清沖和集福會祥五殿建流盃殿於後苑明道元年

八月修文德殿成是夜禁中火延熺崇德長春滋福會慶延慶崇徽天和承明八殿命宰相呂夷簡為修葺大

內使樞密副使楊崇勳副之發京東西河北淮南江東西路工匠給役內出乘輿物左藏庫易緡錢二十萬助

其費以故改諸殿名又有慈德殿在後苑觀種稻延義閣在崇政

通英閣在崇政殿西南蓋侍臣講讀之所也與延義閣景祐二年賜名隆儒殿通英閣內小殿

皇祐三年始賜名慈壽殿皇太后所居治平元年賜名慶壽宮保慈宮熙寧二年

建玉華殿在後苑基春殿熙寧元年建睿思殿八年建承極

殿在後苑殿在玉華殿後殿八年建殿二年



殿 元豐三年建

崇慶隆祐二宮

元祐三年建

睿成宮

神宗所居東宮紹聖二年

賜宣和殿

在睿思殿後紹聖二年四月殿成其東側別有小殿曰凝芳其西曰瓊芳前曰重熙後曰

環碧元符三年廢崇寧初復作大觀三年徽宗製記刻石實蔡京為之

聖瑞宮

皇太妃所居因以名

宮 顯謨閣

元符元年建藏神宗御集建中靖國元年改曰熙明尋復舊

玉虛殿

元符初建

玉華閣

大觀初建在宣和殿後

親蠶宮

政和元年建

燕寧殿

在延福北奉安仁宗

慈聖光獻皇后御容

延福宮

政和三年春新作於大內北拱宸門外舊宮在後苑之西南今其地乃百

司供應之所凡內酒坊裁造院油醋柴炭鞍轡等庫悉移他處又遷兩僧寺兩軍營而作新宮焉始南向殿因

宮名曰延福次曰蓋珠有亭曰碧琅玕其東門曰晨輝其西門曰麗澤宮左復列三位其殿則有穆清成平會

寧睿謨凝和崑玉羣玉其東閣則有蕙馥報瓊蟠桃春  
錦疊瓊芬芳麗玉寒香拂雲偃蓋翠葆鉛英雲錦蘭薰  
摘金其西閣有繁英雪香披芳鉛華瓊華文綺絳萼穠  
華綠綺瑤碧清陰秋香叢玉扶玉絳雲會寧之北疊石  
為山山上有殿曰翠微旁為二亭曰雲巋曰層嶽凝和  
之次閣曰明春其高踰三百一十尺閣之側為殿二曰  
玉英曰玉潤其背附城築土植杏名曰杏崗覆茅為亭  
修竹萬竿引流其下宮之右為佐二閣曰宴春廣十有  
二丈舞臺四列山亭三峙鑿圓池為海跨海為二亭架  
石梁以昇山亭曰飛華橫度之四百尺有奇縱數之二  
百六十有七尺又疏泉為湖湖中作隄以接亭隄中作  
梁以通湖梁之上又為茅亭鶴莊鹿若孔翠諸柵蹄尾  
動數千嘉花名木類聚區別幽勝宛若生成西抵鹿澤  
不類塵境初蔡京命童貫楊戩賈詳藍從熙何訢等分任  
宮役五人者因各為制度不務沿襲故號延福五位東  
西配大內南北稍劣其東直景龍門西抵天波門宮東

西二橫門皆視禁門法所謂晨輝麗澤者也而晨輝門出入最多其後又跨舊城修築號延福第六位跨城之外浚濠深者水三尺東景龍門橋西天波門橋二橋之下疊石為固引舟相通而橋上人物外自通行不覺也名曰景龍江其後又闢之東過景龍門至封邱門景龍江北有龍德宮初元符三年以懿親宅潛邸為之及作景龍江江夾岸皆奇花珍木殿宇比比對峙中塗曰壺春堂絕岸至龍德宮其地歲時次第展拓後盡都城一隅焉名曰擷芳園山水秀麗暢茂樓觀

**保和殿**

政和

參差猶艮嶽延福也

宮在舊城因附見此

政和三年建舊名玉清神霄宮清和陽在福寧殿東

七年改

**上清寶籙宮**

政和五年作在景龍門東對景輝門既又作仁濟輔正二亭於宮前

作上清寶籙宮密連禁署內列亭臺館舍不可勝計命道士施民符藥徽宗時登皇城下視之又開景龍門城

上作複道通寶籙宮以便齋醮之事徽宗數從複道上往來是年十二月始張燈於景龍門上下名曰預賞元宵其明年乃萬歲山艮嶽之政和七年始於上清寶籙宮有期門之事

萬歲山艮嶽

之東作萬歲山山周十餘里

其最高一峯九十步上有界亭分東西二嶺直接南山之東有萼綠華堂有書館八仙館紫石巖棲真磴覽秀軒龍吟堂山之南則壽山兩峯並峙有雁池雍雍亭北直絳霄樓山之西有藥寮有西莊有集雲亭有白龍泝有倚翠樓上下設兩閣閣下有平地鑿大方沼沼中作兩洲東為蘆渚亭曰浮陽西為梅渚亭曰雪浪西流為鳳池東出為雁池中分二館東曰流碧西曰環山有閣曰巢鳳堂曰三秀東池後有揮雪亭復由磴道上至介亭亭左復有亭曰極目曰蕭森右復有亭曰麗雲半出北俯景龍江引江之上流注山澗西行為漱瓊軒又行石間為煉丹凝真觀園山亭下視江際見高陽酒肆

及清澗閣北岸有勝筠菴躡雲臺蕭間館飛岑亭支流  
別為山莊為回溪又於南山之外為小山橫亘二里曰  
芙蓉城窮極巧妙而景龍江外則諸館舍尤精其北又  
因瑤華宮火取其地作大池名曰曲江池中有堂曰蓬  
壺東盡封丘門而止其西則自天波門橋引水直西殆  
半里江乃折南又折北折南者過閭闔門為複道通茂  
德帝姬宅折北者四五里屬之龍德宮宣和四年徽宗  
自為艮嶽記以為山在國之艮故曰艮嶽蔡條謂初名  
鳳凰山後神降其詩有艮嶽排空霄因改名艮嶽宣和  
六年詔以金芝產於艮嶽之萬壽峰又改名壽峯蔡條  
謂南山成又改名壽嶽嶽之正門曰陽華故亦號陽華  
宮自政和迄靖康積累十餘年四方花木奇石悉聚於  
斯樓臺亭館雖畧如前所記而月增日益殆不可以數  
計宣和五年朱勔於太湖取石高廣數丈載以大舟挽  
以千夫鑿河斷橋毀堰折牖數月乃至賜號昭功敷慶  
神運是年初得燕地故也勔緣此授節度使大抵羣閭

興築不肯已徽宗晚歲患苑囿之衆國力不能支數有厭惡語由是得稍止又金人再至圍城日欽宗命取山禽水鳥盡投之汴河聽其所之拆屋為薪鑿石為砲伐竹為篋籬又取大鹿數百千頭殺之以啖戰士云宋史元文至天聖初改今名正接前良嶽下衛士云之後

宋朝會典 今大內即宣武軍節度使治所朱梁建都遂以衙署為建昌宮晉天福初又為大寧宮但改名號而已周世宗雖加營繕猶未合古制建隆三年發開封浚儀民廣皇城四年五月太祖命有司畫洛陽宮殿樓圖修之自是皇都始壯麗矣

趙德麟侯鯖錄 唐宋京宮城東西四里一百八十八步南北二里八十五步周四十三里二百四十一步高四丈八尺宋東京宮城周回五里

邵氏聞見錄 宋京唐汴州梁太祖因宣武軍置建昌宮晉改曰大寧宮周世宗雖加營繕猶未如王者之制藝祖得天下之初即遣使圖西京大內按以改作既成帝坐萬歲殿洞開諸門端直如繩歎曰此如吾心小有私曲人皆見之矣

葉少蘊石林燕語 京師大內梁氏建國止以為建  
昌宮本唐宣武節度治所未暇增大也後唐莊宗遷  
洛復廢以為宣武軍晉天福中因高祖臨幸更號大  
寧宮今龍城是也其增展外羅城蓋周世宗始為之  
太祖建隆初以大內制度草創乃詔圖洛陽宮殿展  
皇城東北隅以鐵騎都尉李懷義與中貴人董役按  
圖營建初命懷義等凡諸門與殿須相望無得輒差  
故垂拱福寧柔儀清居四殿正重而左右掖與升龍



銀臺等諸門皆然惟大慶殿與端門少差耳宮成太祖坐福寧寢殿召近臣入觀諭曰吾心端直正如此有少偏曲處汝曹必見之矣羣臣皆再拜後雖嘗經火屢修率不敢易其故處矣

按石林燕語與邵氏所記畧同

又曰 大慶殿初名乾元太平興國祥符中皆因火改為乾元天安景祐中方改今名有龍墀沙墀凡正至大朝會尊號則御馬郊祀大禮則駕宿於殿之後閣百官為次宿於殿之兩廊皇祐初始行明堂之禮

又以為明堂仁宗御篆明堂二字每行禮則權揭之已而復去明德殿在大慶殿之西少次舊曰端明後改文明祥符中因火再建易今名紫宸殿在大慶殿之後少西其次又為垂拱殿自大慶殿後紫宸垂拱之兩間有柱廊相通每月視朝則御文德所謂過殿也東西閣門皆在殿之兩旁月朔不御過殿則御紫宸所謂入閣也月朔與誕節郊廟成禮受賀契丹辭見亦皆御紫宸文德遇受冊發冊明堂宣赦亦御而

不常用宣麻不御殿而百官即庭下聽之紫宸不受  
賀而拜表稱賀則於東上閣門國忌未赴景寧宮先  
進名表慰則於西上閣門亦既庭下拜而授閣門使  
蓋以閣不以殿也惟垂拱為日御朝之所集英殿舊  
大明殿也明道中改今名每春秋大燕皆在此太祖  
常御策制科舉人故後為進士殿試之所其東廊後  
有樓曰昇平舊紫雲樓也每大燕則宮中登而觀焉  
皇儀殿舊名滋福咸平太宗明德皇后居之以為萬

安宮后崩改舊名明道中改今名故常廢而不用以  
為治后喪之所

又曰東華門直北有東向門西與內東門相值俗謂  
之諛門而無榜張衡東京賦所謂諛門曲榭者也薛  
琮注諛曲屈斜行依城郭為道集韻諛字或作移以  
為宮室相連之稱今循東華門牆而轉東面為北門  
亦可謂斜行依牆矣凡宮禁之言相承必皆有自也

按字訓諛別也東  
京賦但言別門耳

周密癸辛雜識 京師有八卦殿八門各有樹木山石無一相類皆嵌石座亦穿空與石竅相通上欲有所往與所幸美人自一門出宮人仙衣扶輪一聲霹靂則仙樂並奏雲霄間石竅中腦麝烟起如霧

楊奐汴故宮記 元太宗十一年己亥春三月按部至於汴汴長吏宴於廢宮之長生殿懼後世無以考為纂其大概云皇城外南門曰南薰南薰之北新城門曰豐宜橋曰龍津橋北曰丹鳳而其門三丹鳳北

曰州橋橋少北曰文武樓遵御路而北橫街也東曰  
太廟西曰郊社正北曰承天門而其門五雙闕前引  
東曰登聞檢院西曰登聞鼓院檢院之東曰左掖門  
門之南曰待漏院鼓院之西曰右掖門門之南曰都  
堂承天之北曰大慶門而日精門左昇平門居其東  
月華門右昇平門居其西正殿曰大慶殿東廡曰嘉  
瑞樓西廡曰嘉瑞門大慶之後曰德儀殿德儀之東  
曰左昇龍門西曰右昇龍門

元文類二隆  
字並非龍

正門曰隆

德曰蕭牆曰丹墀曰隆德殿隆德之左曰東上閣門  
右曰西上閣門皆南嚮東西二樓鐘鼓之所在鼓在  
東鐘在西隆德之次曰仁安門仁安殿東則內侍局  
內侍之東曰近侍局近侍之東曰嚴祗門宮中則曰  
撒合門少南曰東樓即授除樓也西曰西樓仁安之  
次曰純和殿正寢也純和西曰雪香亭雪香之北后  
妃位也有樓樓西曰瓊香亭亭西曰涼位有樓樓北  
少西曰玉清殿純和之次曰寧福殿寧福之後曰苑

門由苑門而北曰仁智殿有一大石左曰敷錫神運  
萬歲峰右曰玉京獨秀太平石殿曰山莊莊之西南  
曰翠微閣苑門東曰仙韶院院北曰湧翠峰峰之洞  
曰大滌湧翠東連長生殿殿東曰湧金門湧金之東  
蓬萊殿長生西浮玉殿浮玉之西曰瀛洲殿長生之  
南曰閱武殿閱武南曰內藏庫由嚴祗門東曰尚食  
局尚食東曰宣徽院御藥北曰右藏庫右藏之東曰  
左藏宣徽東曰點檢司點檢北曰祕書監祕書北曰



學士院學士之北曰諫院諫院之北曰武器署點檢  
之南曰儀鸞局儀鸞之南曰尚輦局宣徽之南曰拱  
衛司拱衛之南曰尚衣局尚衣之南曰繁禧門繁禧  
南曰安泰門安泰西與左昇龍門直東則壽聖宮兩  
宮太后位本明儀殿試進士之所宮北曰徽音殿徽  
音之北曰燕壽殿燕壽殿垣後少西曰震肅衛司東  
曰中衛尉司儀鸞之東曰小東華門更漏在焉中衛  
尉司東曰祗肅門祗肅門東少南曰將軍司徽音聖

壽之東曰太后苑苑之殿曰慶春慶春與燕壽並小  
東華與正東華對東華門內正北尚殿局尚殿西北  
曰尚醞局湯藥局侍儀司少西曰符寶局器物局西  
則撒合門嘉瑞樓西曰三廟正殿曰德昌東曰文昭  
殿西曰光興殿並南嚮德昌之後宣宗廟也宮西門  
曰西華與東華直其北門曰安貞二大石外凡花石  
臺榭池亭之細並不錄觀其制度簡素比土階茅茨  
則過矣視漢之所謂千門萬戶珠璧華麗之飾則無

有也因其制度而損益之以求其稱斯可矣

素明洪武十一年即宋故宮遺址建周王府乃太祖第五皇子謚定始分封之國宗室繁衍甲於他藩城中井水患苦鹹難飲汴人率於城外汲水飲之惟周府太廟前井水甘蓋宋大內故井也

石林詩話 京師職事官皆無公廨雖宰相執政亦僦舍而居每遇出省或有中批外奏急速文字則省吏徧持於私第呈押既稽緩又多泄漏元豐初始建

東西府於右掖門之前每府相對為四位裕陵幸尚書省駐輦環視久之時張侍郎文裕以詩慶宰執元參政厚之和曰黃閣勢連東鳳闕紫樞光直右銀臺蓋東府與西闕相近西府正直右掖門

避暑錄話 舊學士院在樞密院之後其南廡與樞密後廊中分門乃西向玉堂本以待乘輿行幸非學士所得常居惟禮上之日得畧坐其東受院令參謁而已其後為主廊北出直集英殿則所謂北門也學

士僅有直舍分於門之分旁每鎖院受詔乃與中使坐其中余為學士時始請闢兩直舍各分其一門與北門通為三以照壁限其中屏間命待詔鮑詢畫花竹於其上與玉堂郭熙春江晚景屏相配當時以為美談後聞王丞相將明為承旨太上皇眷愛之厚乃旁取西省右正言廳以廣之中為殿曰右文則非余前日所見

吳處厚青箱雜記

梁祖都汴庶事草創正明中始

於今右長慶門東北創小屋數十間為一館湫隘尤甚又周廬徼道咸出其間衛士騶卒朝夕喧襍每受詔撰述皆移他所至太平興國中車駕臨幸顧左右曰若此卑陋何以待天下賢俊即日詔有司規度左昇龍門東北東府地為三館命內臣督役晨夜兼作不日而成尋下詔賜名崇文院以東廊為昭文館書庫南廊為集賢院書庫兩廊以經史子集四部為史館庫凡六庫書籍正副本八萬本斯亦盛矣

東京夢華錄曰東都外城方圓四十餘里城濠曰護龍河濶十餘丈濠之內外皆植柳粉墻朱戶禁人往來城門皆甕城三層屈曲開門惟南薰門新鄭門新宋門封丘門皆直門兩重蓋此係四正門皆留御路故也新城南壁其門有三正南門曰南薰門城南一邊東南則陳州門傍有蔡河水門西南則戴門亦有蔡河水門蔡河正名惠民河為通蔡州故也東城一邊其門有四東南曰東水門乃汴河下流水門也其門跨河有鐵裹牕門

遇夜如閘垂下水面兩岸各有門通人行路出拐子城

夾岸百餘丈次則曰新宋門次曰新曹門又次曰東北

水門乃五丈河之水門也次曰萬勝門又次曰固子門

又次曰西北水門乃金水河水門也北城一邊其門有

四從東門曰陳橋門

乃大遼入使驛路

次曰封丘門

北郊御路

次曰

新酸棗門次曰衛州門

諸門名皆俗呼其正名如水西門曰利澤鄭州本順天門固子

門本金

新城每百步設馬面戰棚密直女牆旦暮修整

望之聳然城裏牙道各植榆柳成陰每二百步置一防



城庫置守禦之器有廣固兵士二十指揮每日修造泥飾專有京城所提總其事

舊京城方圓約二十里許南壁其門有三正南曰朱雀門左曰保康門右曰新門東壁其門有三從南汴河南岸前門子河北岸曰舊宋門次曰舊曹門西壁其門有三從南曰舊封丘門次曰景龍門乃大內城角寶籙宮前也次曰金水門

穿城河道有四南殿曰蔡河自陳蔡由西南戴樓入京

城遼繞自東南陳州門出河上有橋十一自陳州門裏

曰觀橋

在五岳觀後門

從北次曰宣泰橋次曰雲騎橋次曰橫

橋

在彭婆之宅後

次曰高橋次曰西保康門橋

正對內前

次曰新

橋次曰太平橋

高殿前宅前

次曰糶麥橋次曰第一座橋次

曰宜男橋出戴樓門外曰四里橋中曰汴河自西京洛

口分水入京城東去至泗州入淮運東南之糧凡東南

方物自此入京城公私仰給焉自東水門外七里至西

水門外河上有橋十三從東水門外七里曰虹橋其橋

無柱皆以巨木虛架飾以丹雘宛如飛虹其上下土橋亦如之次曰順城倉橋入水門裏曰便橋次曰下土橋投西角子門曰相國寺橋次曰州橋

正名大漢橋

正對於大

內御街其橋與相國寺橋皆低平不通舟船惟西河平船可過其柱皆青石為之石梁石笋楯欄近橋兩岸皆壁雕鐫海馬水獸飛禽之狀橋下密排石柱蓋車駕御路也州橋之北岸御路東西二闕樓觀對聳橋之西有方淺船二隻頭置巨幹鐵槍數條岸上有鐵索三條遇

夜役上水面蓋防遺失舟船矣西去曰浚儀橋次曰興

國寺橋

亦名馬軍衙橋

次曰太師府橋

蔡相宅前

次曰金梁橋次曰

西浮橋

舊以船為之橋今皆用木石造矣

次曰西水門便橋門外曰橫

橋東北曰五丈河來自濟鄆般輓京東路糧斛入京城

自新曹門外入京河上有橋五東去曰小橫橋次曰廣

備橋次曰蔡市橋次曰青暉橋染院橋西北曰金水河

自京城西南分京索河水築隄從汴河上用木槽架過

從西北水門入京城夾牆遮擁入大內灌後苑池浦矣

河上有橋三曰白虎橋橫橋五王宮橋之類又曹門河  
小子橋曰念佛橋

大內正門宣德樓列五門門皆金釘朱漆壁皆磚石間  
甃鐫鏤龍鳳飛雲之狀莫非雕甍畫棟峻桷層椽後以  
琉璃瓦曲尺朶樓朱欄彩檻下列兩闕亭相對悉用朱  
紅杈子入宣德樓正門乃大慶殿庭設兩樓如寺院鐘  
樓上有太史局保章正測驗時漏逐時刻執牙牌奏每  
遇大禮車駕齋宿及正朔朝會於此殿殿外左右橫門

曰左右長慶門內城南壁有門三座係大朝會趨朝路  
宣德樓左曰左掖門右曰右掖門左掖門裏乃明堂右  
掖門裏西去乃天章寶文等閣宮城至北廊約有丈餘  
入門東去街北廊乃樞密院次中書省次都堂

宰相朝  
退治事

於此門下省次大慶殿外廊橫門北去百餘步又一橫

門每日宰執趨朝此處下馬餘侍從臺諫於第一橫門  
下馬行至文德殿入第二橫門東廊大慶殿東偏門西  
廊中書門下後省次修國史院次南向小角門正對文

德殿

常朝殿也

殿前東西大街東出東華門西出西華門近

裏又兩門相對左右嘉肅門也南去左右銀臺門自東

東華門裏皇太子宫入嘉肅門街南大慶殿後門東西

上閣門街北宣祐門南北大街西廊面東曰凝暉殿乃

通會通門入禁中矣殿相對東廊門乃殿中省六尚局

御厨殿上常列禁衛兩重時刻提警出入甚嚴近裏皆

近侍中貴殿之外皆知省御藥幕次快行親從官輦官

車子院黃院子內諸司兵士祇候宣喚及宮禁買賣進

貢皆由此入宣祐門外西去紫宸

正朔受朝於此

次曰文德殿

常朝所御

次曰垂拱殿次曰皇儀殿次曰集英殿

御宴及試舉人於此

後殿曰崇政殿保和殿內書閣曰春

恐是睿字

思殿後門曰

拱宸門

內諸司皆在禁中如學士院皇城司四方館客省東西

上閣門通進司內弓劍槍甲軍器等庫翰林司

茶酒局也

內

侍省入內侍省內藏庫奉宸庫景福殿庫延福宮殿

中省六尚局

尚藥尚食尚輦尚醞尚舍尚衣

諸閣外內香藥庫後苑作



翰林書藝局醫官局天章等閣明堂班朔布政府

外諸司左右金吾衛仗司法酒庫內酒坊牛羊司乳酪

院儀鸞

帳設局也

車駱院供奉庫襍物庫襍賣務東西作坊

萬全

造軍器所

修內司文思院上下界綾錦院文繡院軍器

所上下竹木務箔場車營致遠務騾務駝務象院作坊

物料庫東西窰務內外物庫油醋庫京城守具所鞍轡

庫養馬曰左右騏驥院天駟十監河南北十炭場四屬

藥局內外柴炭庫軍頭引見司架子營

樓店店務

權貨務

都察場大宗正司左藏大觀元豐宣和等庫偏枯局打套所諸米麥等自州東虹橋元豐倉順城倉水東裏河折中外河折中富國廣盈萬盈永豐濟遠等倉陳州門裏麥庫子州北夷門山五丈河諸倉約共有五十餘所日有支納下卸即有下卸指揮兵士支遣即有袋家每人有兩石布袋遇有支給倉前成市近新城有草場二十餘所每逢冬月諸鄉納粟桿草牛車填塞道路車尾相銜數十萬軸不絕場內堆積如山諸軍打請營在州

北即往州南倉不許雇人搬擔並要親自負米祖宗之法也

坊巷御街自宣德樓一直南去約濶二百餘步兩邊乃御廊舊許市人買賣於其間自政和間官司禁止各要立黑漆杈子路心又要安朱漆杈子兩行中心御道不得人馬行往行人皆在廊下朱杈子之外杈子裏有磚石甃砌御溝水兩道宣和門盡植蓮荷近岸植桃李梨杏棣花相間春夏之間望之如繡

宣德樓前左南廊對左掖門為明堂須朔布政府祕書省右南廊對右掖門近東則兩府八位西則尚書省御街大內前南去左則景靈宮宮右則西宮近南大晟府次曰太常寺州橋曲轉大街面南曰左藏庫

金史南京路國初曰汴京貞元元年更號南京

都城門十四曰開陽曰宣仁曰安利曰平化曰通遠曰宜照曰利川曰崇德曰迎秋曰廣澤曰順義曰迎朔曰順常曰廣智宮城門南外曰南薰南薰北新城門曰豐

宜橋曰龍津橋北門曰丹鳳其門三丹鳳北曰丹橋橋  
少北曰文武樓遵御路而北橫街也東曰太廟西曰郊  
社正北曰承天門其門五雙闕前引東曰登聞檢院西  
曰登聞鼓院檢院東曰左掖門門南曰待漏院鼓院西  
曰右掖門門南曰都堂直承天門北曰大慶門門東曰  
日精門又東曰左昇平門大慶門西曰月華門又西曰  
右昇平門正殿曰大慶殿殿前有龍墀又南有丹墀東  
廡曰嘉福樓西廡曰嘉瑞樓大慶後曰德儀殿殿東曰

左昇龍門西曰右昇龍門正門曰隆德內有隆德殿有  
蕭牆有丹墀隆德殿左曰東上閣門右曰西上閣門皆  
南嚮鼓樓在東鐘樓在西隆德之次曰仁安門仁安殿  
東則內侍局又東曰近侍局又東曰嚴祗門宮中則稱  
曰撒合門少南曰東樓則授除樓也西曰西樓仁安之  
次曰純和殿正寢也純和西曰雪香亭亭北則后妃位  
也有樓樓西曰瓊香亭亭西曰涼位有樓樓北少西曰  
玉清殿仁和之次曰福寧殿殿後曰苑門內曰仁智殿

有二太湖石左曰敷錫神運萬歲峯右曰玉京獨秀  
太平巖殿曰山莊其西南曰翠微閣閣北曰翠峯峯之  
洞曰大滌湧翠東連長生殿又東曰湧金殿又東曰蓬  
萊殿長生西曰浮玉殿又西曰瀛洲殿長生殿南曰閱  
武殿又南曰內藏庫嚴祇門東曰尚食局又東曰宣徽  
院院北曰御藥局又北右藏庫東則左藏庫宣徽院東  
曰點檢司司北曰祕書監又北曰學士院又北曰諫院  
又北曰武器署點檢司南曰鸞儀局又南曰尚輦局宣

徽院南曰拱衛司又南曰尚衣局其南為繁禧門又南曰安泰門門與左昇龍門相直東壽聖宮兩宮太后也本明俊殿試進士之所宮北曰徽音院又北曰燕壽殿殿垣後西曰振肅衛司東曰中衛尉司儀鸞局東曰小東華門更漏在焉中衛尉司東曰祇肅門少東南曰將軍司徽音壽聖東曰太后苑苑殿曰慶春與燕壽殿並小東華與正東華門對東華門內正北尚殿局其西北曰臨武殿左掖門北尚食局南曰宮苑司其西北尚醞



局湯藥局侍衛司少西曰符寶局器物局又西則撒合門也嘉瑞樓西曰三廟正殿曰德昌東曰文昭西曰光興德昌後宣宗廟也宮西門曰西華與東華相直北門曰安貞

大金國志曰貞元三年國主陰有南征之志乃謀遷都汴京先遣參知政事馮長寧為留守經畫修內未幾天火焚之宮室皆盡主大怒免長寧為庶人尋杖之死

正隆元年冬復修汴京大內遣左丞相領行臺尚書省

督其事以梁漢臣為提舉官號大使詔曰朕祇奉上元君臨萬國屬從朔地爰出幽都猶跼蹐於一隅非光宅於中土顧理道所在有因有循權變所生有革有化大梁天下之都會陰陽之正中朕惟變通之數其可違乎往歲卜宅相土宜建新都將命不虔燼於一炬第山川秀麗卉物繁滋朕夙有志焉雖則劬勞其究安宅其大內規模一仍舊貫可大興營構乘時葺理

汴京制度宣宗所遷大槩依宋之舊故宮宮牆四角皆

有樓高五丈每樓一所兩旁各有屋以裹牆角自左掖門向西三十步橫入一門號左昇龍門入此門即大慶門外游峻廊上俯闡城中正望丹鳳樓後下樓即右昇龍門此兩門通左右掖門橫通大慶門外其門有三中曰大慶東曰日精西曰月華門旁皆列戟入此門望見大慶殿殿前有兩樓對峙東曰嘉福西則嘉瑞大慶殿屋十一間龍墀二級旁朶殿各三門峻廊後與兩廡相接殿壁畫四龍各長四丈乃宣宗渡河後畫中有御畫

小龍用拱斗鬪成一方井如佛正殿蓋中有一金龍以  
絲網罩之此正衙也轉西御屏下峻階數步一殿曰德  
義殿有三門中曰隆平左曰左隆平右曰右隆平入此  
門東西兩井望見隆德殿即宋垂拱殿也殿庭中東一  
鐘樓西一鼓樓殿屋五大間階上龍墀一級東西兩閣  
門並樓屋下有門通往來此常朝殿也此殿後又一庭  
院有門曰仁安東西兩門東出東華門入仁安門望見  
仁安殿龍墀兩廊皆入仁德殿規模即宋集英殿也自

此後兩殿有門皆有船軒連接兩邊廊屋止是黑漆牕戶意謂必宮人居於此乃內殿百官不到前四殿皆琉璃筒瓦一殿曰德和一殿曰福寧後有一小殿殿後有直舍此殿後即內宮牆門有門兩重出入後苑十數步間過一小溪橋有仁智殿溪中有龍舟仁智殿下兩巨石高二丈廣半之東一石有小碑刻勅賜昭度神運萬峯西一石刻獨秀太平巖乃宋徽宗御書刻石填金殿後有石壘成山高百尺廣倍之最上刻石曰香石泉山

山後輓水上山水自流下至荆玉澗又流至湧翠峯下  
有大山湧水自洞門飛下復由本路出德和殿迤邐至  
大慶門外橫從右昇龍門出後朝門榜曰啓慶之宮入  
宮門後有三門中曰德昌左曰文昭右曰光興制度宏  
麗金碧輝映不可勝言出啓慶門復入右昇龍門過大  
慶門外出左昇龍門向東行一門向南榜曰聖壽宮左  
安泰門右明昌門即金國太后宮入宮門直入一門榜  
曰徽音又一門榜曰光熙望見徽音殿長樂殿入光翼

門繁禧門有德壽殿復出此宮即祕閣在左掖門之西  
五門之東即古待漏院自五門望南向丹鳳門中間禁  
路兩廊千步廊盡處向東一屏牆向南一大門即太廟  
門內三門門上並畫蟠龍殿宇二十五間高大宏麗兩  
旁修廊東西各開一門與廊相通蓋百官陪位入此兩  
門甚便殿上十一室盡榜金國祖宗謚號每一室計三  
門東邊一門西邊一總嵌一小石室上下有石廣三丈  
石門一閣可開閉係藏神主處遇祭祀迎神主出石室

祭畢復藏殿宇出太廟向西行向南一門即社壇周圍  
皆牆外四門遇祭則開迎四方之氣宮室制度金國時  
有改更大抵皆宋朝之舊也

歷代帝王宅京記卷十七